



*Sabtu, 30 September 2023*

**Ogen : Amos 8:4-14**



**Dibata La Lupa Kejahaten**



**F**ormalitas, kerina terjeng gelah enggo ilakoken saja. Labo je ukur ras pusuh i bas ndahiken sada dahin e. Perbahanen si bagenda nge silakoken bangsa Israel. Eribadah, nehken persembahen, nden-nden pujin ku Rumah Pertoton tapi dahin e ilakokenna terjeng gelah idah kalak. Gelah enggo ngelakoken aturen agama. Bage, bage saja lalap. Perbahan labo je ukurna, ndekahsa nge akapna kebaktin sinilakoken e, janah tupung kebaktin e lain si man tangkelenna. "ndigan ndia wari raya enda keru segelah banci kita erbinaga gandum?" Lanai sabar dungna perayaan-perayaan e segelah minter ndahiken dahin e me erbinaga. Ipekitikna tumba pendayan, ipeberat anak timbangan penukuren, janah ipake timbangan palsu guna nipu langganen. Tuhu-tuhu perbahanenna la lit kebujuren sada pe lang. Bas ukurna uga gelah ia ndatken untung si mbe lin, janah la ngukurken kinirugin kalak sideban. adi langganenna pe itipuna apai ka kalak sideban, uga pe igedapkenna nari nge e.

Erkite-kiteken si e me, merawa Tuhan dengen ikatakenNa "Asa ndigan pe la Aku lupa kejahatenna". Kata enda jadi persinget man bangsa Israel maka kejahaten e iidah Dibata kerina. Sada pe la lit siterligen dengen ilupakenNa kerina sinilakoken. Seh ku bas pusuh ietehNa kap. Oratna maka teridah min buah kiniteken, kinitutusen ersembah e arah kegeluhen si teptep wari. Icidahken min tanda-tanda kiniteken sinialoken labo terjeng i bas Rumah Pertoton tapi pe bas pendahin. Ingan pendahin e jadi ingan naksiken kiniteken sedekah enda. Bage maka ernanam, jadi pasu-pasu ku ja pa pe.

Senina Moria, arah renungen enda mabai kita berintegritas i bas kiniteken. Keaktipen Moria belinen asangkan kategorial sidebanna i bas dahin-dahin pelayanen. Teridah dengen tergejap min ulihna i bas kinata kegeluhen si teptep wari segelah la terjeng formalitas, tapi tuhu-tuhu mere ngaruh.

*☞ Mari Cidahken buah kiniteken e*